

現代生活藝術系列

華嚴經疏論纂要 9

— 世主妙嚴品之八

華藏淨宗學會印贈

大方廣佛華嚴經疏論纂要卷第九

五臺山清涼國師澄觀疏鈔

太原方山長者李通玄論

閩鼓山私淑比丘道需纂要

世王妙嚴品第一 之八

○第六王火神十法

復次普光燄藏王火神得悉除一切世間暗解脫門。
普集光幢王火神得能息一切衆生諸惑漂流熱惱。
苦解脫門大光徧照王火神得無動福力大悲藏解。
脫門衆妙宮殿王火神得普能除煩惱塵解脫門無。

盡光髻主火神。得光明照曜無邊虛空界。解脫門。種
種燄眼主火神。得種種福莊嚴寂靜光。解脫門。十方
宮殿如須彌山主火神。得能滅一切世間諸趣熾然
苦。解脫門。威光自在主火神。得自在開悟一切世間
解脫門。光照十方主火神。得永破一切愚癡執著見
解脫門。雷音電光主火神。得成就一切願力大震吼
解脫門。

疏有云準梵本。此脫第四。一以進力現世除物無
明。以最初故。偏從火義。二惑有二義。一漂。一惱。善
巧迴轉。則能息之。三稱性之福。相惑不動。與大悲

合。自利不動。俱能攝德無盡。名藏四有云。準梵本。神名勝上。藥光普照。法門。名普能除煩惱塵。謂劫海行滿故。今能現通滅惑。偈云。衆妙宮神。同前列名。衆妙卽勝上義耳。然諸本多無。或有本則具云。衆妙宮殿。主火神。得大慈悲。廣蔭衆生。解脫門。恐是傳寫脫漏耳。五光。明照曜等者。日光合空等。空無際。智符實相。稱實無邊。雖曠劫修成。全同本有。窮靈極數。妙盡難思。實爲惑本。卽是正因。智照心源。卽是了因。妙日光合空等者。初舉喻也。智符已下。二合。以智合日。以實相合空。符者分而合也。實相體上。本有智光。無始迷之。今方朗悟。卽我始會之。非照今有。故與實相。分而合也。實

相無邊。智亦無邊。如空無際。光亦無際。雖曠劫修成。全同本有者。以偈文會義也。偈云。億劫修成。不可思求。其邊際莫能知。義乃修成。智無際耳。何得分而合之。故今答云。雖則修成。全同本有。是以經云。演法實相。令歡喜。故疏結云。窮靈極數。卽是修成。妙盡難思。卽符本有。亦猶始覺。同本覺。無復始本之異。爲究竟覺。窮靈極數之言。卽肇論劉遺民所難般。若無知論語。謂窮其靈鑑。極其數運。妙無不盡。則合心體難思耳。如空與日。今畧申十義。以辨難思。一謂日與空非。卽非離二。非住非不住。三而日善作破闇良緣。顯空之要。四雖復滅暗。顯空。空無損益。五理實無損。事以推之。暗蔽永除。性乃無增。空界所含。萬像皆現。六而此虛空。性雖清淨。若無日光。則有闇起。七非以虛空空故。自能除暗。暗若除者。

必假日光。八日若無空無光無照。空若無日暗不自除。九然此暗性無來無去。日之體相亦不生不滅。十但有日照空。則乾坤洞曉。以智慧日照心性。空亦有十義。準喻思之。非唯釋此文。乃遠通衆經。該羅前後。六體寂發。照名寂靜光。以斯成福。莊嚴身相。七八可知。九分別法相。永離不了愚癡。悟法實性。便無執著之見。十以行扶頤。故能現世作

師子吼

爾時普光燄藏王火神。承佛威力。普觀一切王火神衆。而說頌言

疏頌加第四餘竝可知

汝觀如來精進力

廣大億劫不思議

爲利衆生現世間

所有暗障皆令滅

衆生愚癡起諸見

煩惱如流及火然

導師方便悉滅除

普集光幢於此悟

福德如空無有盡

求其邊際不可得

此佛大悲無動力

光照悟入心生喜

我觀如來之所行

經於劫海無邊際

如是示現神通力

衆妙宮神所了知

億劫修成不可思

求其邊際莫能知

演法實相令歡喜

無盡光神所觀見

十方所有廣大衆

一切現前瞻仰佛

寂靜光明照世間

此妙燄神所能了

牟尼出現諸世間

坐於一切宮殿中

普雨無邊廣大法

此十方神之境界

諸佛智慧最甚深

於法自在現世間

能悉闡明真實理

威光悟此心欣慶

諸見愚癡爲暗蓋

衆生迷惑常流轉

佛爲開闡妙法門

此照方神能悟入

願門廣大不思議

力度修治已清淨

如昔願心皆出現

此震音神之所了

○第七主水神十法

復次普興雲幢主水神。得平等利益一切衆生。慈解脫門。海潮雲音主水神。得無邊法莊嚴解脫門。妙色輪髻主水神。得觀所應化方便普攝解脫門。善巧漩澁主水神。得普演諸佛甚深境界解脫門。離垢香積主水神。得普現清淨大光明解脫門。福橋光音主水神。得清淨法界無相無性解脫門。知足自在主水神。得無盡大悲海解脫門。淨喜善音主水神。得於菩薩衆會道場中爲大歡喜藏解脫門。普現威光主水神。

得以無礙廣大福德力普出現解脫門吼聲徧海王
水神得觀察一切衆生發起如虛空調伏方便解脫
門

〔疏〕一無緣大慈是曰平等。二無邊行法莊嚴自他
三寂然不動以觀機感而遂通以隨攝。若冬則積
雪凝白。夏則無處不流。四妙音演佛深旨。令悟妙
法漩復。五身智。二光徧覺開化。大充法界。清淨無
垢。六證淨法界性相俱絕。德無不見。則大用不亡。
七衆生不窮。故大悲無盡。滿而不溢。有知足義焉。
流止從緣。斯爲自在。八處處見佛。故大喜無窮。喜

從佛生卽佛名藏。若聆泉流之響無不悅也。九性相無礙之福。故能普現神通。若空色相映之流。威光蕩漾。十調生行。廣如空無邊。用靡蹇停。如空無盡。

爾時普興雲幢王水神。承佛威力。普觀一切王水神衆而說頌言。

清淨慈門刹塵數

共生如來一妙相

一一諸相莫不然

是故見者無厭足

〔疏〕偈中第一偈前半辨一相因果。次句例餘。後句辨益。初言清淨者。離過無緣故。門如塵數者。隨宜

利樂故以慈爲因得妙相果以相爲因得無厭果
 然如來相有純有雜此就純門若以雜門則隨一
 相一毛皆收如來法界行盡亦相相皆爾純雜無
 礙因果相融圓成非分成故佛一相一毛卽同法
 界無有分量今此神從一慈門入無盡相耳此約
 十身之相鈔前半辨一相因果等者疏文有二先
 消經文辨十身相後引經論辨三身相
 今初言純雜無礙因果相融者然如來相亦具四
 句一因一相二因一切相三此皆純門三一切
 因一相四一切因一切相皆是雜門正純恆雜雜
 而常純故云無礙由因無礙果相亦無礙故得圓
 成非分成耳以一切純雜無礙之行成一相故故
 此一相卽同法界况因果交徹因中有無盡之果
 果中有難若三十二相之因但說一相一因如智
 思之因

度瑜伽等論。涅槃大集等經。至相海品當引。若三

相下。第二引經及論說三身相。唯語化身。而總指

在餘智論當三十二。瑜伽當四十九。涅槃二十九

經云善男子。若菩薩摩訶薩。持戒不動。施心不移

安住實語。如須彌山。以是因緣。得足下平。如險底

相。若於父母所。和尙師長。乃至畜生。以如法財供

養。供給。以是因緣。得足下千輻輪相。若菩薩不殺

不盜。於父母師長。常生歡喜。以是因緣。得成三相

一手指纖長。二足跟修長。三其身方直。若菩薩修

四攝法。攝取眾生。以是因緣。得網縵指。如白鷺王

若菩薩父母師長。若病苦時。以手洗拭。捉持按摩。

以是因緣。得手足柔軟。若菩薩持戒聞法。惠施無

厭。以是因緣。得節踝臄滿。身毛上靡。若菩薩專心

聽法。演說正教。以是因緣。得鹿王膺。若菩薩於諸

眾生。不生害心。飲食知足。常樂惠施。瞻病給藥。以

是因緣。其身圓滿。如尼拘陀樹。立手過膝。頂有肉

髻。無見頂相。若菩薩見怖畏者。為作救護。見裸露

者。施與衣服。以是因緣。得陰藏相。若菩薩親近智

者。遠離愚人。善喜問答。掃治行路。以是因緣。皮膚

者。遠離愚人。善喜問答。掃治行路。以是因緣。皮膚

細滑身毛右旋。若菩薩常以飲食衣服臥具醫藥
 香華燈明施人。以是因緣。得身金色。常光照曜。若
 菩薩行施之時。所施之物。能捨不恡。不觀福田。及
 非福田。以是因緣。得七處滿相。若菩薩布施之時
 心不生疑。以是因緣。得柔軟聲相。若菩薩如法求
 財。以用布施。以是因緣。得骨充滿。師子上身。臂肘
 臚。纖若菩薩遠離兩舌惡口。恚恨。以是因緣。得四
 十齒。白淨齊密。若菩薩於諸衆生。修大慈悲。以是
 因緣。得二牙相。若菩薩常作是願。有來求者。隨意
 給與。以是因緣。得師子頰。若菩薩隨諸衆生。所須
 之食。悉皆與之。以是因緣。得味中上味。若菩薩自
 修十善。兼以化人。以是因緣。得廣長舌。若菩薩不
 訟彼短。不謗正法。以是因緣。得梵音聲。若菩薩見
 諸怨憎。生於慈心。以是因緣。得目睫紺色。若菩薩
 不隱他德。稱揚其善。以是因緣。得白毫相。善男子
 若菩薩修習如是三十二相業。因緣時。則得不退
 菩提之心。

世尊往昔修行時

普詣一切如來所

種種修治無懈倦

如是方便雲音入

佛於一切十方中

寂然不動無來去

應化衆生悉令見

此是髻輪之所知

如來境界無邊量

一切衆生不能了

妙音演說徧十方

此善漩神所行處

世尊光明無有盡

充徧法界不思議

說法教化度衆生

此淨香神所觀見

疏第五偈初言無盡以顯光常。次充法界以辨光

徧。不思議者以顯光淡。非色現色。非青黃而青黃

故。其第三句是顯光用。餘五可知。

如來清淨等虛空

無相無形徧十方

而令衆會靡不見

此福光神善觀察

佛昔修習大悲門

其心廣徧等衆生

是故如雲現於世

此解脫門知足了

十方所有諸國土

悉見如來坐於座

朗然開悟大菩提

如是喜音之所入

如來所行無罣礙

徧徃十方一切刹

處處示現大神通

普現威光已能悟

修習無邊方便行

等衆生界悉充滿

神通妙用靡暫停

吼聲徧海斯能入

○第八主海神十法

復次出現寶光主海神。得以等心施一切衆生福德。
海衆寶莊嚴身解脫門。不可壞金剛幢主海神。得巧
方便守護一切衆生善根解脫門。不雜塵垢主海神。
得能竭一切衆生煩惱海解脫門。恒住波浪主海神。
得令一切衆生離惡道解脫門。吉祥寶月主海神。得
普滅大癡暗解脫門。妙華龍髻主海神。得滅一切諸
趣苦與安樂解脫門。普持光味主海神。得淨治一切
衆生諸見愚癡性解脫門。寶燄華光主海神。得出生
一切寶種性菩提心解脫門。金剛妙髻主海神。得不

動心功德海解脫門。海潮雷音王。海神得普入法界。
三昧門解脫門。

〔疏〕頌脫第三。一爲物供佛。是等施福德。衆寶相以
莊嚴身。二巧隨根欲。說法護善。使其長成。三謂演
深廣法。體煩惱空。梵本偈云。一切世間衆導師。法
雲大雨不可測。消竭無窮諸苦海。此離垢塵入法
門。若準此文。乃竭苦海。四若見佛境。則惑亡苦息。
準現經文。三是煩惱。四是於苦。若依梵本。前苦後
惑。旣譯人脫漏。致使文義參差。故古德云。脫第四
頌。結名旣同。故知脫第三。恆住波浪者。卽是替用。

水爲宮殿。五以智滅癡。六爲行所遷。一切皆苦。菩提因起。則生滅苦亡。便得涅槃寂滅安樂。七將智滅癡。未免於見了癡。見性癡見自亡。真妄等觀。是佛境界也。八一切衆生。有佛種性。圓明可貴。具德稱寶。佛眼普觀。佛智普示。正因令顯。如出金藏。大心若起。如種生芽。故云出生。緣了二因。爲能悟之。鈔道。正因令顯。如出金藏。卽涅槃經。如貧女家中寶藏之喻。九了如不取。則心不搖動。湛如停海。萬德攸歸。故須彌可傾。魔豈能燒。一念降魔。如本行集。了如不取。則心絕動搖者。金剛經云。不取於相。如如不動。須彌可傾。魔豈能燒者。卽高僧傳中。慧嵬禪師之事。雲林修定。有一惡鬼。而現其前。有身無首。

令禪師懼。公安然不懼。而慰之言。喜汝無頭痛之患。次現無腹之鬼。復云喜汝無五藏之憂。如是隨來隨遣。竟不能惑。魔又化爲天女。云天帝令我以備掃灑。公曰。我心如地。難可傾動。無以革囊見試。天女乃騰雲而去。讚曰。大海可竭。須彌可傾。彼上人者。執志堅貞。今用一句。義意全同。十入法界定。如法界徧。

爾時出現寶光主海神。承佛威力。普觀一切主海神衆而說頌言。

疏偈文可知

不可思議大劫海

供養一切諸如來

普以功德施羣生

是故端嚴最無比

一切世間皆出現

衆生根欲靡不知

普爲弘宣大法海

此是堅幢所欣悟

一切世間衆導師

法雲大雨不可測

消竭無窮諸苦海

此離垢塵入法門

一切衆生煩惱覆

流轉諸趣受衆苦

爲其開示如來境

普水宮神入此門

佛於難思劫海中

修行諸行無有盡

永截衆生癡惑網

寶月於此能明入

佛見衆生常恐怖

流轉生死大海中

示彼如來無上道

龍髻悟解生欣悅

諸佛境界不思議

法界虛空平等相

能淨衆生癡惑網

如是持味能宣說

佛眼清淨不思議

一切境界悉該覽

普示衆生諸妙道

此是華光心所悟

魔軍廣大無央數

一剎那中悉摧滅

心無傾動難測量

金剛妙髻之方便

普於十方演妙音

其音法界靡不周

此是如來三昧境

海潮音神所行處

○第九主河神十法

復次普發迅流主河神得普雨無邊法雨解脫門普
潔泉澗主河神得普現一切衆生前令永離煩惱解

脫門。離塵淨眼。主河神。得以大悲方便。普滌一切衆生。諸惑塵垢。解脫門。十方徧吼。主河神。得恒出饒益衆生音。解脫門。普救護衆生。主河神。得於一切含識中。恒起無惱害慈。解脫門。無熱淨光。主河神。得普示一切清涼善根。解脫門。普生歡喜。主河神。得修行具足。施令一切衆生永離慳著。解脫門。廣德勝幢。主河神。得作一切歡喜福田。解脫門。光照普世。主河神。得能令一切衆生雜染者清淨。瞋毒者歡喜。解脫門。海德光明。主河神。得能令一切衆生入解脫海。恒受具足樂。解脫門。

疏一行成雨法。若霈然洪霑。滅惑生德。若懸河迅流。無所滯礙。二現身息惱。若泉澗洗心。三眞實滌垢。慈智相資。若碧沼澄潭。空色交映。故名離塵淨眼。四圓音徧益。若崩浪發響。五拯救漂溺。六善根無惑。可謂清涼。若阿耨達池。永無熱惱。七施門無量。令彼無慳。若蒹藻菱蓮。皆令物喜。八行福契實。故見無不欣。若澗湖廣陂。是爲廣德。九方便慧力。雜染皆淨。慈彼冤害。瞋反成歡。若萬頃波澄。光暎天下。十總收萬善。令會涅槃。若彼百川。咸會大海。田智海故。名海德光明。

爾時普發迅流王河神。承佛威力。普觀一切王河神
衆而說頌言

〔疏〕偈亦可知

如來往昔爲衆生

修治法海無邊行

譬如霈澤清炎暑

普滅衆生煩惱熱

佛昔難宣無量劫

以願光明淨世間

諸根熟者令悟道

此普潔神心所悟

大悲方便等衆生

悉現其前常化誘

普使淨治煩惱垢

淨眼見此深歡悅

佛演妙音普使聞

衆生愛樂心歡喜

悉使滌除無量苦

此徧吼神之解脫

佛昔修習菩提行

爲利衆生無量劫

是故光明徧世間

護神憶念生歡喜

佛昔修行爲衆生

種種方便令成熟

普淨福海除衆苦

無熱見此心欣慶

施門廣大無窮盡

一切衆生咸利益

能令見者無慳著

此普喜神之所悟

佛昔修行實方便

成就無邊功德海

能令見者靡不欣

此勝幢神心悟悅

衆生有垢咸淨治

一切怨害等生慈

故得光照滿虛空

普世河神見歡喜

佛是福田功德海

能令一切離諸惡

乃至成就大菩提

此海光神之解脫

○第十王稼神十法

復次柔軟勝味王稼神得與一切衆生法滋味令成就佛身解脫門時華淨光王稼神得能令一切衆生受廣大喜樂解脫門色力勇健王稼神得以一切圓滿法門淨諸境界解脫門增益精氣王稼神得見佛大悲無量神通變化力解脫門普生根果王稼神得普現佛福田令下種無失壞解脫門妙嚴環髻王稼

神得普發衆生淨信華解脫門。潤澤淨華王稼神得
大慈愍濟諸衆生。令增長福德海解脫門。成就妙香
王稼神得廣開示一切行法解脫門。見者愛樂王稼
神得能令法界一切衆生捨離懈怠憂惱等諸惡。普
清淨解脫門。離垢光明王稼神得觀察一切衆生善
根隨應說法。令衆會歡喜滿足解脫門。

疏一功德智慧二種法味。資成佛身。二喜樂由於
苦除。三衆生爲所淨之境。四悲深故通廣。五下種
佛田。必至果無壞。六智數物信。獲果稱華。七慈眼
視物。故福聚無量。慈則恬和怡悅。偈云勝道。八以

行成佛。故始成卽宣。九懈於修習。憂惱是生。勤策諸根。衆惡清淨。十隨根爲說。遂求故喜。

爾時柔軟勝味王稼神。承佛威力。普觀一切王稼神衆。而說頌言。

〔疏偈文可知〕

如來無上功德海

普現明燈照世間

一切衆生咸救護

悉與安樂無遺者

世尊功德無有邊

衆生聞者不唐捐

悉使離苦常歡喜

此是時華之所入

善逝諸力皆圓滿

功德莊嚴現世間

一切衆生悉調伏

此法勇力能明證

佛昔修治大悲海

其心念念等世間

是故神通無有邊

增益精氣能觀見

佛徧世間常現前

一切方便無空過

悉淨衆生諸惑惱

此普生神之解脫

佛是世間大智海

放淨光明無不徧

廣大信解悉從生

如是嚴髻能明入

如來觀世起慈心

爲利衆生而出現

示彼恬怡最勝道

此淨華神之解脫

善逝所修清淨行

菩提樹下具宣說

如是教化滿十方

此妙香神能聽受

佛於一切諸世間

悉使離憂生大喜

所有根欲皆治淨

可愛樂神斯悟入

如來出現於世間

普觀衆生心所樂

種種方便而成熟

此淨光神解脫門

○第十一王藥神十法

復次吉祥王藥神。得普觀一切衆生心而勤攝取解脫門。梅檀林王藥神。得以光明攝取衆生俾見者無空過解脫門。離塵光明王藥神。得能以淨方便滅一切衆生煩惱解脫門。名稱普聞王藥神。得能以大名

稱增長無邊善根海解脫門。毛孔現光主藥神。得大
悲幢速赴一切病境界解脫門。破暗清淨主藥神。得
療治一切盲冥衆生令智眼清淨解脫門。普發吼聲
主藥神。得能演佛音說諸法差別義解脫門。蔽日光
幢主藥神。得能作一切衆生善知識。令見者咸生善
根解脫門。明見十方主藥神。得清淨大悲藏。能以方
便令生信解脫門。普發威光主藥神。得方便令念
佛滅一切衆生病解脫門。

〔疏〕一順情則易攝。逆意則難調。故普觀之。二三可
知。四始學者以名爲實賓。大士以名爲佛事。五以

慈善根力放月愛等光身心兩病纔念便滅鈔慈善根
 力者慈善根卽涅槃第十五經云復次善男子菩薩
 薩四無量心能爲一切諸善根本下廣說慈心行
 施發起大願竟云善男子一切聲聞緣覺菩薩諸
 佛如來所有善根慈爲根本善男子菩薩摩訶薩
 修習慈心能生如是無量善根謂不淨觀等皆從
 此生結云如是等法慈爲根本善男子以是義故
 慈是眞實非虛妄也若有人問誰是一切諸善根
 本當言慈是以是義故實非虛妄善男子能爲善
 者名實思惟實思惟者卽名爲慈慈卽如來慈卽
 大乘大乗卽慈慈卽如來善男子慈卽菩提道菩
 提道卽是如來如來卽慈次廣說慈德是一切善
 法下廣說慈德如提婆達多欲害如來令阿闍世
 王放護財醉象我卽入慈定舉手示之卽於指端
 出五師子卽便怖畏舉身投地敬禮我足善男子
 我時手指實無師子乃是修慈善根力故令彼調
 伏廣說緣起皆悉結歸慈善根力放月愛等光卽
 涅槃二十經爾時世尊爲阿闍世王入月愛三昧入三
 絕躡地爾時世尊爲阿闍世王入月愛三昧入三

味已。放大光明。其光清涼。往照王身。身疾卽愈。鬱蒸除滅。乃至云。問者。婆何等。名爲月夢三昧。耆婆答言。有六義似。一。譬如月光。能令一切優鉢鉢羅華。開敷鮮明。月夢三昧。亦復如是。能令衆生善心。開敷。是故名爲月夢三昧。二。如月能令行路歡喜。此三昧能令修習涅槃道者歡喜。三。一日至十五日。形色漸滅。此能令善根增長。四。十六至三十日。形惱熱。六如月衆星中。王甘露一味。人所愛樂。月夢三昧。亦復如是。諸善中。王甘露一味。一切衆生之所愛樂。是故復名月夢三昧。

六迷理迷報。二愚盲冥起惑造業。備受衆苦。佛以正法金錒開其智眼。令明三諦故。

云清淨。佛以正法金錒者。卽涅槃第八。迦葉菩薩。白佛言。世尊。佛性者。云何甚深難見。難入。

佛言。善男子。如百盲人爲治目故。造詣良醫。是時良醫卽以金錒。抉其眼膜。以一指示。問言。見不。盲人答言。我猶未見。復以二指。三指。指示之。乃言。少見善男子。是大涅槃微妙經典。如來未說。亦復如是。

無量菩薩雖已具足諸波羅密乃至十住猶未能
得見於佛性如來既說卽便少見是菩薩旣得見
已感作是言甚奇世尊我等流轉無量生常爲
無我之所惑亂善男子如是菩薩位階十地尚不
了了知見佛性何況聲聞緣覺之人能得見耶澤
州釋云十地菩薩各修十度名爲百人涅槃爲金
鐒經初一說名一指示中間重說名二指示經末
復說名三指示下合中未見佛性竝如盲人延公
云金鐒喻教扶膜者教能生解喻破無明卽今疏
意故云正法金鐒而言三指喻三僧祇乃至十地
未了分明故言少見若準澤州則涅槃爲鐒三說
爲三指者若俱約教則鐒指不殊若以涅槃爲所
詮者又不順喻寧取延公然三僧祇爲三指者亦
順前示及與後示亦順十住少見之言今不取者
遂令佛說一時之中不具三指又以時喻指以未
全同故疏自釋以三諦爲三指指爲旨趣義甚分
明一時橫觀皆觀三諦豎至十住亦證三諦第一
指者卽示俗諦言凡是有心定當作佛皆有佛性
二示真諦爲第二指云佛性卽是無上菩提中道種子
中道爲三指經云佛性卽是無上菩提中道種子

故非有如虛空。非無如兔角。故知三諦。喻於三指。七八可知。九無變見之。大悲。生物德。故名藏。十世醫療治。雖差還生。永滅生德。無先念佛。因病因光。皆是方便。謂佛有無邊相。相有無邊好。好放無邊光。光攝無邊衆。言隨念者。佛德齊均。隨緣隨樂。趣稱一佛。三昧易成。敬一心。濃餘盡然矣。况心凝覺路。闇蹈大方。

爾時吉祥王藥神。承佛威力。普觀一切王藥神衆。而說頌言。

疏頌可知

如來智慧不思議

悉知一切衆生心

能以種種方便力

滅彼羣迷無量苦

大雄善巧難測量

凡有所作無空過

必使衆生諸苦滅

栴檀林神能悟此

汝觀諸佛法如是

往昔勤修無量劫

而於諸有無所著

此離塵光所入門

佛百千劫難可遇

若有得見及聞名

必令獲益無空過

此普稱神之所了

如來一一毛孔中

悉放光明滅衆患

世間煩惱皆令盡

此現光神所入門

一切衆生癡所盲

惑業衆苦無量別

佛悉蠲除開智照

如是破暗能觀見

如來一音無限量

能開一切法門海

衆生聽者悉了知

此是大音之解脫

汝觀佛智難思議

普現諸趣救羣生

能令見者皆從化

此蔽日幢深悟了

如來大悲方便海

爲利世間而出現

廣開正道示衆生

此見方神能了達

如來普放大光明

一切十方無不照

令隨念佛生功德

此發威光解脫門

○第十二王林神十法

復次布華如雲。主林神得廣大無邊智海藏解脫門。
擢榦舒光。主林神得廣大修治普清淨解脫門。生芽
發耀。主林神得增長種種淨信芽解脫門。吉祥淨葉
主林神得一切清淨功德莊嚴聚解脫門。垂布燄藏
主林神得普門清淨慧恒周覽法界解脫門。妙莊嚴
光。主林神得普知一切衆生行海而興布法雲解脫
門。可意雷聲。主林神得忍受一切不可意聲演清淨
音解脫門。香光普徧。主林神得十方普現昔所修治
廣大行境界解脫門。妙光迴曜。主林神得以一切功
德法饒益世間解脫門。華果光味。主林神得能令一

切見佛出興。常敬念。不忘莊嚴功德藏。解脫門。

〔疏〕一佛德無邊。皆依智海。含德流光。所以名藏。二

等衆生悲。是爲廣大。一一離障。名普清淨。三一切

勝因。皆爲佛道。各各心淨。則種種芽生。四一切功

德。莊嚴一毛。一一皆然。故佛爲德聚。良以佛果攬

因。皆圓成。非分成。是故一因生一切果。一果收一

切因。皆圓融無礙耳。五智通萬法。故曰普門。客塵

不生。故曰清淨。悟如日照。頓周法界。功如拂鏡。說

智漸明。明是本明。漸爲圓漸。鈔悟如日照等者。楞

唯用。四漸四頓。多依地位。古今同爲此釋。亦順
經文。今釋通於橫豎。則位位之中。皆有頓義。然約

橫論頓復有多義。一頓悟漸修。如見九層之臺。則可頓見。要須躡階而後得升。今亦如是。頓了心性。卽心卽佛。無法不具。而須積功。徧修萬行。此約解悟。二者頓修漸悟。卽如磨鏡。一時徧磨。明淨有漸。萬行頓修。悟則漸勝。此約證悟。三頓修頓悟。如利劔斬絲。千莖齊斬。一時齊斷。亦如染絲。一時齊染。一時成色。萬行齊修。一時朗悟。四漸修漸悟。猶如斬竹。節節不同。此非今用。今言悟如日照。卽解悟。證悟皆悉。頓也。卽頓修頓悟。功如拂鏡。亦非漸修。是頓修漸悟義。言明是本明漸爲圓漸者。此融上二恐人謂拂鏡非頓。明鏡本來淨。何用拂塵埃。故爲會之。此是六祖直顯本性。破其漸修。今爲順經。明其漸證。隨漸漸明。皆本明矣。故云明是本明。卽無念體上自有真知。非別有知。知心體也。言漸爲圓漸者。卽天台智者意。彼有言云。漸漸非圓。漸圓圓非漸。圓謂漸家亦有圓漸。圓家亦有圓漸。漸家漸者。如江出岷山。始於濫觴。漸家圓者。如大江千里。圓家漸者。如初入海。雖則漸深。一滴之水。已過大江。况濫觴耶。圓家圓者。如窮海涯底。故今六知云。漸是圓家漸。尚過漸家之圓。况漸家之漸。六知

徧趣行。如應布法。七了音聲性。皆同佛音。故無不可意。能令世間。皆聞佛音。方云清淨。八音行。稱周法界。是廣大境。神通普令物見。倣而行之。如下喜目。卽其事也。九衆生諂佞。自不修德。寧有進賢之心。今福智益他。則物我兼利。偈云諛諛。卽諛佞也。衆生諂佞。自不修德者。詩云。內有進賢之志。而無諛諛之心。蒼頡篇曰。諛。謂諛佞也。十敬念則佛興。佛興則莊嚴德藏。障重者。不念不見。於佛豈無常哉。故應見常見也。

爾時布華如雲。王林神。承佛威力。普觀一切王林神衆。而說頌言。

佛昔修習菩提行

福德智慧悉成滿

一切諸力皆具足

放大光明出世間

悲門無量等衆生

如來往昔普淨治

是故於世能爲益

此擢榦神之所了

若有衆生一見佛

必使入於深信海

普示一切如來道

此妙芽神之解脫

一毛所集諸功德

劫海宣揚不可盡

諸佛方便難思議

淨葉能明此深義

我念如來於往昔

供養剎塵無量佛

一一佛所智漸明

此燄藏神之所了

一切衆生諸行海

世尊一念悉了知

如是廣大無礙智

妙莊嚴神能悟入

恒演如來寂妙音

普生無等大歡喜

隨其解欲皆令悟

此是雷音所行法

如來示現大神通

十方國土皆周徧

佛昔修行悉令見

此普香光所入門

衆生諛誑不修德

迷惑沉流生死中

爲彼闡明衆智道

此妙光神之所見

佛爲業障諸衆生

經於億劫時乃現

其餘念念常令見

此味光神所觀察

○第十三主山神十法十頌

復次寶峯開華主山神。得入大寂定光明解脫門。華
林妙髻主山神。得修習慈善根成熟不可思議數衆
生解脫門。高幢普照主山神。得觀察一切衆生心所
樂嚴淨諸根解脫門。離塵寶髻主山神。得無邊劫海
勤精進無厭怠解脫門。光照十方主山神。得以無邊
功德光普覺悟解脫門。大力光明主山神。得能自成
熟復令衆生捨離愚迷行解脫門。威光普勝主山神。
得拔一切苦使無有餘解脫門。微密光輪主山神。得
演教法光明顯示一切如來功德解脫門。普眼現見

主山神得令一切衆生乃至於夢中增長善根解脫門。金剛堅固眼主山神。得出現無邊大義海解脫門。

疏

一寂而常照。故光無不闡。二相光熟機。皆慈善

根力。如涅槃廣明。三修因巖根。本爲順物。故矚蓮目而欣樂。觀月面而歡心。或見諸根。一一皆周法界。喜亦淡矣。四如空不染。故長劫無怠。五癡故長眠。唯福智之能覺。次三可知。九若睡若寤。皆令聞法進行。斯爲佛業。如大瓔珞經說。過去有佛。凡欲說法。令大衆眠。夢中說法。令增善根。覺得道果。涅槃亦云。其人夢中見羅刹像等。亦表萬法皆夢。大

夢之夜必有大覺之明。羅鈔涅槃亦云其人夢中見品迦葉菩薩白佛言世尊云何未發菩提心者得菩提因佛告迦葉若有聞是大涅槃經言我不發菩提心誹謗正法是人即於夢中見羅刹像心中怖懼羅刹語言咄善男子汝今若不發菩提心當斷汝命是人惶怖寤已即發菩提之心是人命終若在三趣及在人天續復憶念菩提之心當知是人名大菩薩摩訶薩也十稱性法門無邊大義二音能演是出現也

爾時開華市地主山神承佛威力普觀一切王山神衆而說頌曰

往修勝行無有邊

今獲神通亦無量

法門廣闊如塵數

悉使衆生深悟喜

衆相嚴身徧世間

毛孔光明悉清淨

大慈方便示一切

華林妙髻悟此門

佛身普現無有邊

十方世界皆充滿

諸根嚴淨見者喜

此法高幢能悟入

歷劫勤修無懈怠

不染世法如虛空

種種方便化羣生

悟此法門名寶髻

衆生盲暗入險道

佛哀愍彼舒光照

普使世間從睡覺

威光悟此心生喜

昔在諸有廣修行

供養刹塵無數佛

令衆生見發大願

此地大力能明入

見諸衆生流轉苦

一切業障恒纏覆

以智慧光悉滅除

此普勝神之解脫

一一毛孔出妙音

隨衆生心讚諸佛

悉徧十方無量劫

此是光輪所入門

佛徧十方普現前

種種方便說妙法

廣益衆生諸行海

此現見神之所悟

法門如海無邊量

一音爲說悉令解

一切劫中演不窮

入此方便金剛目

○第十四主地神十法

復次普德淨華主地神。得以慈悲心。念念普觀一切

衆生解脫門。堅福莊嚴主地神。得普現一切衆生福
德力解脫門。妙華嚴樹主地神。得普入諸法。出生一
切佛刹莊嚴解脫門。普散衆寶主地神。得修習種種
諸三昧。令衆生除障垢解脫門。淨目觀時主地神。得
令一切衆生常遊戲快樂解脫門。金色妙眼主地神。
得示現一切清淨身調伏衆生解脫門。香毛發光主
地神。得了知一切佛功德海大威力解脫門。寂音悅
意主地神。得普攝持一切衆生言音海解脫門。妙華
旋髻主地神。得充滿佛刹離垢性解脫門。金剛普持
主地神。得一切佛法輪所攝持普出現解脫門。

疏一念念無間平等普觀修慈護法故得金剛之

體金剛卽內照之實也鈔修慈護法故得金剛之體亦涅槃意彼第三問云

云何得長壽金剛不壞身故以長壽品答金剛不壞

由不殺及施僧之食為因金剛身品答金剛不壞

身問因於護法故經初明金剛身義云爾時世尊

復告迦葉善男子如來身者是常任身不可壞身

金剛之身非雜食身卽是法身下迦葉難次如來

廣答金剛身相後迦葉徵因云唯然世尊如來法

身金剛不壞而未得知所因云何佛告迦葉以能

護持正法因緣故得成就就是金剛身常在壞善男

昔護法因緣今得成就就是金剛身常在壞善男

子護持正法者不受五戒不修威儀應持刀劍弓

箭矛稍守護持戒清淨比丘此後廣說護法之相

便引往昔此拘尸城有歡喜增益如來末法之中

覺德比丘能師子吼為破戒比丘共戰時王被鱗舉身

國王名為有德與破戒比丘共戰時王被鱗舉身

周徧覺德讚王王聞法已卽便命終生阿閼佛國

為彼如來第一弟子覺德比丘卻後壽終亦生彼

國爲第二弟子。故知能護功高。所護生公釋金剛身云。長壽之與金剛。皆共談丈六。但內外之異。長壽與外應之迹。金剛與內照之實。實照體圓。故無方也。然則長壽金剛。並義通內外。而金色示滅。故以實照爲常。實則至妙之色。亦常不變矣。然長壽對凡夫之天促。金剛對凡身之危脆。故無長無短。方爲長壽。非實非虛。始曰金剛。而推其因。由護法者。護法令法久住。護法身矣。今疏文中言修慈護法者。護法卽涅槃。二一毛福力。頓現衆福。三證入文。修慈卽今偈意。

無生不礙嚴刹。四一向爲他。五觀機出現。名爲游戲。六現淨惑身。方調物惑。七內具德海。現威力身。如地含海。潤發生百穀。百穀苗稼。皆地香毛故。八長行。一言盡攝無餘。偈頌則一言普徧無極。九燄雲普徧。令物離垢爲性。十法能攝持心行。如金剛。

之輪。佛則不動。現世若須彌出海。

爾時普德淨華主地神。承佛威力。普觀一切主地神衆。而說頌言。

〔疏〕此下頌中。亦有二句。結法屬人。可以意得。

如來往昔念念中。大慈悲門不可說。

如是修行無有已。故得堅牢不壞身。

三世衆生及菩薩。所有一切衆福聚。

悉現如來毛孔中。福嚴見已生歡喜。

廣大寂靜三摩地。不生不滅無來去。

嚴淨國土示衆生。此樹華神之解脫。

佛於往昔修諸行

爲令衆生消重障

普散衆寶主地神

見此解脫生歡喜

如來境界無邊際

念念普現於世間

淨目觀時主地神

見佛所行心慶悅

妙音無限不思議

普爲衆生滅煩惱

金色眼神能了悟

見佛無邊勝功德

一切色形皆化現

十方法界悉充滿

香毛發光常見佛

如是普化諸衆生

妙音普徧於十方

無量劫中爲衆說

悅意地神心了達

從佛得聞深敬喜

佛毛孔出香燄雲

隨衆生心徧世間

一切見者皆成熟

此是華旋所觀處

堅固難壞如金剛

不可傾動踰須彌

佛身如是處世間

普持得見生歡喜

○第十五主城神十法

復次寶峯光曜主城神得方便利益衆生解脫門。妙
嚴宮殿主城神得知衆生根教化成熟解脫門。清淨
喜寶主城神得常歡喜。令一切衆生受諸福德解脫
門。離憂清淨主城神得救諸怖畏大悲藏解脫門。華
燈燄眼主城神得普明了大智慧解脫門。燄幢明現

主城神得普方便示現解脫門。盛福威光。主城神得普觀察一切衆生。令修廣大福德。海解脫門。淨光明身。主城神得開悟一切愚暗衆生。解脫門。香幢莊嚴髻。主城神得破一切煩惱臭氣。出生一切智性香氣。解脫門。寶峯光目。主城神得能以大光明破一切衆生障礙。山解脫門。

疏有云。脫第九法。十頌具足。一光等方便成熟利

益。二應病與藥。令得服行。三護法法存。則物受福

德。教理行果。皆有護也。鈔教理行果皆有護也者。有毀謗教不惜身命折伏

護持爲護教也。得旨契經。便爲護理。修行無缺。卽爲護行。此二若護正覺果圓卽爲護果。四悲

救無盡名藏。五了佛大智。六方便現身。七同修佛德。八迷真俗理。故云愚暗。佛出開示。令其悟入。本迷無始。猶若生盲。雖聞譬喻。竟不識乳。唯佛出世。方能曉之。本迷無始等者。卽涅槃經第十四。南本喻謂貝。稻米末。雪。鶴。經云。如生盲人。不識乳色。便問他言。乳色何似。他人答言。色如白貝。盲人復問。是乳色者。如貝聲耶。答言。不也。後問貝色爲何似。耶。答言。如稻米末。盲人復問。乳色柔軟。如稻米末耶。稻米末者。復何所似。答言。如雪。盲人復問。言。彼稻米末。冷如雪耶。雪復何似。答言。猶如白鶴。是生盲人。雖聞如是。四種譬喻。竟不能得識乳真色。釋曰。貝可喻常。末可喻樂。雪可喻淨。鶴可喻我。然經中前三各誤領解。而鶴一種畧無誤領。應言。如鶴動耶。然其四喻。皆是眼境。彼但身觸。何能知耶。非唯外道不知。四德智眼未開。空欲暗證。如彼盲人觸四境也。言唯佛出世。方能曉之者。示其出世常

樂我淨開其智。九準梵本云。香幢莊嚴髻王城神。
眼見分明。得破一切煩惱臭氣。出生一切智性。香氣解脫門。
謂正使爲臭物。殘習爲臭氣。智性爲香體。利物爲
香氣。香氣若高山之出雲。稱智性而無盡。臭氣若
香風之捲霧。等性空之無邊。煩惱則塵習。雙亡。智
慧則自他兼利。有本亦具云。香髻莊嚴王城神。得
開發衆生清淨妙智。解脫門。亦恐傳寫之脫漏耳。
義不異前。偈云。現夢中者。夢是神遊。亦見聞之氣
分也。夢中尙調。况於覺悟。如迦旃延爲弟子。現夢
境界等。夢是神遊。漢武故事。昔漢武帝欲試善圓
夢者。乃詐爲夢云。朕夢見殿上兩瓦。化爲

鴛鴦飛去。是何徵耶。圓夢者曰。宮中必有暴死之者。帝曰。戲之耳。言未畢。監司奏云。宮人相殺。帝曰。朕實不夢。而有徵者。何耶。對曰。夢是神遊。陛下欲言。卽是夢也。亦見聞之氣分者。卽智論五夢之中。見聞多故爲夢也。言五夢者。一熱氣多故夢火。二冷氣多故夢水。三風氣多飛空。四見聞多入夢。五天神與夢如下。夢忍如迦旃延爲弟子。現夢者。莊嚴論說迦旃延有弟子爲希羅王捨王位出家於山林中修道。有一鄰國王名阿盤地。遊獵至山。其王安寢。宮人詣比丘所。比丘爲其說法。王覺謂誘我。宮人遂鞭撻比丘。比丘痛苦。心生怨恨。我不相犯。非理見辱。遂欲還家爲王伐彼師。勸不止。便言且畱一宿。明當任去。卽畱一宿。夜中迦旃延示之以夢。夢見還國。國人迎之。卻立爲王。與大臣商議。徵兵伐怨。而戰敗。失道。遂被彼擒。將欲刑戮。忽遇本師。本師告言。前苦相勸。何爲不從。此王夢中號訴。師言大師救命。失聲便覺悲泣。白師不復還家。是爲迦旃延之善巧。覺化不得。夢化便遂。十二

障五蓋。重疊如山。非智光明。莫之能破。

爾時寶峯光曜主城神承佛威力普觀一切主城神
衆而說頌言

導師如是不思議

光明徧照於十方

衆生現前悉見佛

教化成熟無央數

諸衆生根各差別

佛悉了知無有餘

妙嚴宮殿主城神

入此法門心慶悅

如來無量劫修行

護持往昔諸佛法

意常承奉生歡喜

妙寶城神悟此門

如來昔已能除遣

一切衆生諸恐怖

而恒於彼起慈悲

此離憂神心悟喜

佛智廣大無有邊

譬如虛空不可量

華目城神斯悟悅

能學如來之妙慧

如來色相平等衆生

隨其樂欲皆令見

燄幢明現心能悟

習此方便生歡喜

如來徃修衆福海

清淨廣大無邊際

福德幢光於此門

觀察了悟心欣慶

衆生愚迷諸有中

如世生盲卒無覩

佛爲利益興於世

清淨光神入此門

如來自在無有邊

如雲普徧於世間

乃至現夢令調伏

此是香幢所觀見

衆生癡暗如盲瞽

種種障蓋所纏覆

佛光照徹普令開

如是寶峯之所入

○第十六道場神十一法

復次淨莊嚴幢道場神。得出現供養佛廣大莊嚴具
誓願力解脫門。須彌寶光道場神。得現一切衆生前
成就廣大菩提。行解脫門。雷音幢相道場神。得隨一
切衆生心所樂。令見佛。於夢中爲說法解脫門。雨華
妙眼道場神。得能雨一切難捨衆寶莊嚴具解脫門。
清淨燄形道場神。得能現妙莊嚴道場。廣化衆生。令
成熟解脫門。華纓垂髻道場神。得隨根說法。令生正

念解脫門。雨寶莊嚴道場神。得能以辯才普雨無邊
歡喜法解脫門。勇猛香眼道場神。得廣稱讚諸佛功
德解脫門。金剛彩雲道場神。得示現無邊色相樹莊
嚴道場解脫門。蓮華光明道場神。得菩提樹下寂然
不動而充徧十方解脫門。妙光照曜道場神。得顯示
如來種種力解脫門。

疏一出現字兩用。謂有佛出現。卽出現莊嚴具而
爲供養。佛昔如是。神以大願做之。一對物成行。令
物做之。施爲行。先故偈徧舉。三夢覺皆化。則時處
俱徧。四外寶內眼。重重難捨。爲物捨行。故云能雨。

五清淨燄形神。前列中無。謂色相道場。俱妙莊嚴。竝爲熟物。六疑境界者。以唯心爲正念。疑法性者。以無得爲正念。實則無正無邪。方稱曰正。無念不念。是真念矣。諸念不生。正念方生耳。故隨根兩法。斷疑生智。七辨才兩法。稱根故喜。八深廣讚佛。故名實雙美。九樹王眷屬。竝如經初。十卽前身徧十方。而無來往。智入諸相。了法空寂也。十一種種力者。佛有無量力。故因行亦然。皆嚴具顯示。旣是道場之神。故得道場事中解脫。

爾時淨莊嚴幢道場神。承佛威力。普觀一切道場神。

衆而說頌言

我念如來往昔時

於無量劫所修行

諸佛出興咸供養

故獲如空大功德

佛昔修行無盡施

無量刹土微塵等

須彌光照菩提神

憶念善逝心欣慶

如來色相無有窮

變化周流一切刹

乃至夢中常示現

雷幢見此生歡喜

昔行捨行無量劫

能捨難捨眼如海

如是捨行爲衆生

此妙眼神能悟悅

無邊色相寶燄雲

現菩提場徧世間

燄形清淨道場神

見佛自在生歡喜

衆生行海無有邊

佛普彌綸雨法雨

隨其根解除疑惑

華纓悟此心歡喜

無量法門差別義

辯才大海皆能入

雨寶嚴具道場神

於心念念恒如是

於不可說一切土

盡世言辭稱讚佛

故獲名譽大功德

此勇眼神能憶念

種種色相無邊樹

普現菩提樹王下

金剛彩雲悟此門

恒觀道樹生歡喜

十方邊際不可得

佛坐道場智亦然

蓮華步光淨信心

入此解脫深生喜

道場一切出妙音

讚佛難思清淨力

及以成就諸因行

此妙光神能聽受

○第十七足行神十法

復次寶印手足行神。得普雨衆寶生廣大歡喜解脫門。蓮華光足行神。得示現佛身。坐一切光色蓮華座。令見者歡喜解脫門。最勝華髻足行神。得一一心念中。建立一切如來衆會道場解脫門。攝諸善見足行神。得舉足發步。悉調伏無邊衆生解脫門。妙寶星幢足行神。得念念中化現種種蓮華網光明普雨衆寶。

出妙音聲。解脫門。樂吐妙音。足行神。得出生無邊歡。
喜海。解脫門。梅檀樹光。足行神。得以香風。普覺一切。
道場。衆會。解脫門。蓮華光明。足行神。得一切毛孔放。
光明。演微妙法音。解脫門。微妙光明。足行神。得其身。
徧出種種光明。網普照曜。解脫門。積集妙華。足行神。
得開悟一切衆生。令生善根。海解脫門。

疏初二可知。三內則念念安於理事。外則處處建
立道場。四舉足下足。海印發揮。諸有威儀。無非佛
事。五以華以光。雨寶雨法。六衆生無邊。是佛化境。
見佛聞法。故生歡喜。七圓音警物等。旃檀之香風。

暫一熏修。覺身心之調順。餘三可知。

爾時寶印手足行神。承佛威力。普觀一切足行神衆。而說頌言。

佛昔修行無量劫

供養一切諸如來

心恒慶悅不疲厭

喜門深大猶如海

念念神通不可量

化現蓮華種種香

佛坐其上普遊往

紅色光神皆覩見

諸佛如來法如是

廣大衆會徧十方

普現神通不可議

最勝華神悉明矚

十方國土一切處

於中舉足若下足

悉能成就諸羣生

此善見神心悟喜

如衆生數普現身

此一一身充法界

悉放淨光雨衆寶

如是解脫星幢入

如來境界無邊際

普雨法雨皆充滿

衆會覩佛生歡喜

此妙音聲之所見

佛音聲量等虛空

一切音聲悉在中

調伏衆生靡不徧

如是梅檀能聽受

一切毛孔出化音

闡揚三世諸佛名

聞此音者皆歡喜

蓮花光神如是見

佛身變現不思議

步步色相猶如海

隨衆生心悉令見

此妙光明之所得

十方普現大神通

一切衆生悉開悟

衆妙華神於此法

見已心生大歡喜

○第十八身衆神十法

復次淨喜境界身衆神。得憶佛往昔誓願海解脫門。海
光照十方身衆神。得光明普照無邊世界解脫門。海
音調伏身衆神。得大音普覺一切衆生令歡喜調伏
解脫門。淨華嚴髻身衆神。得身如虛空周徧住解脫
門。無量威儀身衆神。得示一切衆生諸佛境界解脫
門。最勝光嚴身衆神。得令一切飢乏衆生色力滿足

解脫門。淨光香雲身衆神。得除一切衆生煩惱垢解脫門。守護攝持身衆神。得轉一切衆生愚癡魔業解脫門。普現攝化身衆神。得普於一切世王宮殿中顯示莊嚴。相解脫門。不動光明身衆神。得普攝一切衆生。皆令生清淨善根解脫門。

疏一淨喜境界神者。初列處名華髻莊嚴。或是名廣畧舉其半。或梵音相類。譯者之誤。未勘梵本。二三可知。四相卽無相。故如空徧住。空非獨虛。亦徧於色。住非分住。一塵亦周。如芥子空。卽不可盡。身與法性不可分故。鈔空非獨虛者。意云。非謂無物處。是虛空出現品云。譬如虛空。

徧至一切色非色處故。任非分任。一塵亦周者。如
來在一塵中。亦全法界之廣大身。皆具在故。舉芥
子空證已。五威儀施化無心頓現。斯卽佛境難以
如前引。言思六佛爲良田。出世難遇。一興微供。果獲五常。
畧言色力亦有常命安樂辨才。此五皆常。方云滿
足。受報無盡。故悉離貧窮。果獲五常者。疏文具列。
卽涅槃第二純陀施食
處說。下廻向施食中當廣明之。受報無盡者。亦純
陀事。卽三十一經師子吼菩薩白佛言。世尊。如佛
先告純陀云。汝今已得見於佛性。得大涅槃。阿耨
多羅三藐三菩提。是義云何。世尊。如佛所說。施畜
生者。得百倍報。乃至云。施不退菩薩。及最後身諸
大菩薩。如來世尊所得福報無量無邊。不可稱計。
不可思議。純陀大士若受如是無量報者。是報無
盡。何時當得阿耨多羅三藐三菩提。此下廣說施
相。下佛答意云。如向難言。純陀報無盡者。謂世間
報。然業有多種。不必定受。隨人所造。愚智等殊。今

純陀大智將此施業。唯爲菩提。及利衆生。云何令
受人天之報。不得菩提。况所造業。及受果報。皆是
垂跡。若善若惡。非現生後。受是業報。下廣說業有
定不定。愚智輕重。一切聖人。爲壞定業。得輕報故。
不定之業。無果報等。則報無盡者。是約世間。今疏
爲順。悉離貧窮。故引世間。受無盡報耳。非取彼經
師子吼。菩薩之難意。七齒光除垢。表所說淨故。八有染於五
塵。無慈於六趣者。愚癡魔業也。體五欲性。虛已兼
亡。彼業斯轉。而名云守護攝持者。善守根門。攝散
持德。則遠魔矣。然魔事。惑不出三毒。及慢。魔惱衆
生。不出三事。謂上妙五欲。及諸苦具。爲說邪法。則
三毒是生。三毒內著。卽爲魔業。今守護覺察。魔如
之何。卽偈中解脫道也。九此有三意。一身雖周於

法界多示爲王。攝御自在故。二八相處於王宮。俯接物故。三法界菩提樹下。法王宮故。十迷於本空。故有妄苦。無漏本有是淨善根。

爾時淨喜境界身衆神。承佛威力。普觀一切身衆神。衆而說頌言。

我憶須彌塵劫前

有佛妙光出興世

世尊於彼如來所

發心供養一切佛

如來身放大光明

其光法界靡不充

衆生遇者心調伏

此照方神之所見

如來聲震十方國

一切言音悉圓滿

普覺羣生無有餘

調伏聞此心歡慶

佛身清淨恒寂滅

普現衆色無諸相

如是徧住於世間

此淨華神之所入

導師如是不思議

隨衆生心悉令見

或坐或行或時住

無量威儀所悟門

佛百千劫難逢遇

出興利益能自在

令世悉離貧窮苦

最勝光嚴入斯處

如來一一齒相間

普放香燈光燄雲

滅除一切衆生惑

離垢雲神如是見

衆生染惑爲重障

隨逐魔徑常流轉

如來開示解脫道

守護執持能悟入

我觀如來自在力

光布法界悉充滿

處王宮殿化衆生

此普現神之境界

衆生迷妄具衆苦

佛在其中常救護

皆令滅惑生喜心

不動光神所觀見

○第十九執金剛神十法

復次妙色那羅延執金剛神得見如來示現無邊色
相身解脫門日輪速疾幢執金剛神得佛身一一毛
如日輪現種種光明雲解脫門須彌華光執金剛神
得化現無量身大神變解脫門清淨雲音執金剛神

得無邊隨類音解脫門。妙臂天主執金剛神。得現爲一切世間主。開悟衆生解脫門。可愛樂光明執金剛神。得普開示一切佛法差別門。咸盡無遺解脫門。大樹雷音執金剛神。得以可愛樂莊嚴具攝一切樹神。解脫門。師子王光明執金剛神。得如來廣大福莊嚴聚。皆具足明了解脫門。密餽吉祥目執金剛神。得普觀察險惡衆生心。爲現威嚴身解脫門。蓮華摩尼髻執金剛神。得普雨一切菩薩莊嚴具。摩尼髻解脫門。

疏一見如來身。普現非別。豈唯凡現之處。卽無邊相。亦隨一一色相。皆無有邊。二三四可知。第五神。

初卷中名諸根美妙。今但云妙臂。文義俱闕。又加
天主。以現爲世主故。六法海深奧。槃節差別。巧說
令現。無有遺餘。七約神。且說寶飾爲嚴。巧攝已衆。
約佛。方便相好爲嚴。無不攝也。八因深故。大福爲
能嚴。果勝故。德相皆明足。九惡謂十惡。險者惡之
因也。能陷自他。及險道故。十若以現文。則摩尼髻
是所雨。若以義取。此神名摩尼髻。亦得髻是能雨。
一切菩薩嚴具。是所雨。表菩薩智光圓滿故。

爾時妙色那羅延執金剛神。承佛威力。普觀一切執
金剛神衆。而說頌言。

汝應觀法王 法王法如是 色相無有邊

普現於世間 佛身一一毛 光網不思議

譬如淨日輪 普照十方國 如來神通力

法界悉周徧 一切衆生前 示現無盡身

如來說法音 十方莫不聞 隨諸衆生類

悉令心滿足 衆見牟尼尊 處世宮殿中

普爲諸羣生 闡揚於大法 法海漩澗處

一切差別義 種種方便門 演說無窮盡

疏偈中第六云。漩澗者。水之旋流洄澗之處。一甚

深故。一迴轉故。三難渡故。法海旋澗亦然。一唯佛

能究故。二真妄相循難窮初後故。三聞空謂空前
沉於旋復聞有謂有等皆類此知。故云一切差別
義也。鈔真妄相循難窮初後故者。若言先妄後真
真起真亦非真。若妄體卽真妄亦無始爲破始起
立無始言始旣不存終從何立無終無始豈有中
間故中論云大聖之所說本際不可得。生處無有
始亦復無有終。若無有始終中當云何有。是故於
此中先後共亦無真妄兩亡。方說真妄真妄交徹
何定始終聞空謂空則沉於旋復者。大分深義所
謂空也以空爲空雖深而沉矣。餘三句亦然不取
空相則無所沉何以故空相不可得故。若復見有
空諸佛所不化故空
卽有故有等亦然

無邊大方便

普應十方國

遇佛淨光明

悉見如來身

供養於諸佛

億刹微塵數

功德如虛空 一切所瞻仰 神通力平等
一切刹皆現 安坐妙道場 普現衆生前
燄雲普照世 種種光圓滿 法界無不及
示佛所行處

疏餘竝可知

上來異生衆竟

大方廣佛華嚴經疏論纂要卷第九

寶善菴住山比丘太榮特捐衣孟奉刊
華嚴經世主妙嚴品疏論纂要第九卷流

通伏願

棲心法界廣度衆生在在建立法幢生
生常弘大道紹隆

三寶普答四恩

康熙二十年七月佛歡喜日華藏室謹題